

嵩

書

曩閱河南通志嵩山之下註云其山三尖峰左曰
太室右曰少室予甚異三尖之語大不相肖欲著
論辯之逡巡未遑也繼見前提學副使周公夢暘
嵩少遊記云出密縣而西上下岡阜嵩山青翠英
英來逼人而迤南一孤峰巋然獨秀問其名曰御
砦也御砦若嵩山之首旣至嵩乃知遠數十里派
不相蒙矣予讀至此始恍然悟纂通志者必偶從
嵩東一望遂信爲真見而不疑耳是何異相人者
止見半面輒評曰是夫一耳一目而鼻一孔也止

見項後輒評曰是夫無眉目無口鼻僅有耳而無
孔也豈不謬哉予淹嵩五載與嵩日親尺寸而度
之錙銖而權之凡所載筆悉從獨照雖不敢自謂
並得其神情亦庶幾乎山靈知己矣

門人
焦弘祚
陳懋齡校字

高書卷之二終

嵩書卷之三

文林郎登封縣知縣傅梅元鼎撰

卜營篇

外方長曰天地亦物也物中之物有定者有遷者定者歷千萬年而不變遷者或以代計或以世計或以歲計平陂往復迭變無端大易所以取象於復隍詩人所以寄慨於黍離也嵩山自開闢至今終古如斯可不謂定哉嵩山之下大者州邑城郭小者宮室臺榭無有有無不知其幾變矣此皆往古聖賢之所經

理英雄之所戰爭帝王之所豫遊而方內方外之士
之所棲託也今也大半辱於樵牧牛羊之跡甚有問
其遺址而人無對者可勝歎哉幸而遷者自遷定者
自定指點於流峙引證於載籍而興廢升沈之故可
得而言矣竊嘗譬之嵩猶人也巖巖二室如其身也
一切土木附麗於嵩者嵩之袞也袞葛靡常時所爲
也時乎時乎消息盈虛天地且不能違而況山川乎
而況山川之附麗乎

州邑一

中嶽嵩山本禹貢外方豫州之域或曰兗州見漢書
夏為王畿周初為東都近地平王東遷鄭取之乃屬
鄭戰國韓滅鄭遂屬韓秦屬三川郡前漢為潁陽陽
城密高三縣俱屬潁川郡潁陽在少室西南陽城在
太室東南武帝元封元年置崇高為中嶽奉邑在太
室之下即今之登封縣是也凡三縣後漢因之省崇
高入陽城三國屬魏晉為陽城縣屬河南郡西魏為
陽城潁陽堙陽康城縣屬陽城郡西魏獻文帝天安
二年復置潁陽縣孝文帝太和十三年分潁陽置堙

陽縣明帝孝昌二年始陞陽城縣為陽城郡領陽城
潁陽二縣復分陽城置康城縣俱隸陽城郡東魏為
潁陽堙陽縣屬中川郡東魏靜帝天平初置中川郡
使領堙陽潁陽二縣後周為嵩陽縣屬河南郡廢潁
陽縣置入隋為嵩陽陽城縣屬河南郡隋文帝開皇
初廢陽城郡六年改嵩陽縣為武林縣十六年以所
廢陽城郡為嵩州十八年改武林縣為輪氏縣仁壽
四年廢嵩州復為陽城縣並廢舊康城縣入焉煬帝
大業元年又改輪氏縣為嵩陽縣是為陽城嵩陽三

縣俱屬河南郡唐爲登封告成潁陽縣屬河南郡唐
高祖武德四年王世充僞陽城令王雄來降以陽城
嵩陽陽翟置嵩州又析三縣地置康城縣太宗貞觀
三年州廢省康城十七年省嵩陽縣入陽城縣高宗
永淳元年營奉天宮分陽城緱氏復置嵩陽縣二年
省武后光宅元年復置嵩陽縣載初元年析河南伊
闕嵩陽置武林縣萬歲登封元年將封嵩山更名嵩
陽爲登封縣陽城爲告城縣中宗神龍元年復改登
封曰嵩陽告城曰陽城二年復名嵩陽曰登封陽城

曰告成玄宗開元十五年更名武林曰潁陽是爲登
封告成潁陽三縣隸河南郡五代無考宋爲潁陽登
封縣仍屬河南府宋仁宗慶曆二年廢潁陽縣爲鎮
四年復置神宗熙寧二年省潁陽入登封縣哲宗元
祐二年復析爲潁陽縣金爲登封縣屬中京金昌府
元仍爲登封縣屬河南府

本朝因之今潁陽告成爲二鎮並屬登封

城郭二

黃城在嵩東南二十五里箕山相近許由所隱之處

也見羅氏路史或曰堯聘許由壇墀也見雜道書
黍城在少室南中有少姨廟見含玄齋集按少室一
名負黍山城因山以得名也史記鄭伐韓敗韓兵
於負黍即此地後漢書云陽城有負黍聚

古城在邑西北一里故址猶存耕者絕不見瓦礫之
遺必非治所意者古人屯軍之壁壘乎

孤竹城在嵩山西南三十里潁水穿城址而流名稱
無考前令有附會夷齊刻之石者予不信也闕疑
以俟知者

登封新城登封城僅三里自正德間修築後百年就
圯萬曆辛亥春予重修之易故堞一千有二改四
門剏四樓各有署名見後又四方建四堞四隅起
四亭

屏嵩郭登封之北關廂也北城門外故無居民山水
衝奔盡成坑塹患且及城趾矣萬曆辛亥冬予相
地勢橫築長堤於厲壇之前障水東之平治道路
建一坊於郭門之外扁曰屏嵩聽民結廬未幾遂
成三家之市強名曰郭

關鎮三

轅轅關在登封西北二十八里與偃師交界之處道路盤轉車轅相見故名關駟十三州志曰轅轅道凡十二曲也今在緱氏縣東南左傳稱晉欒盈過周王使候出諸轅轅即此地獻帝春秋曰車駕出洛陽自轅轅而東楊奉韓暹引軍追之輕騎既至操設伏兵要於陽城山峽中大敗之夫自轅轅而東過陽城其為今地無疑或謂關在鞏者謬矣

鄂阪關

今在告成鎮晉地理志云陽城有鄂阪關是

為地中

陽城關

西魏置孝昌十二年陞陽城縣為陽城郡復

分陽城置康城縣並置陽城關今不詳其地矣

石羊關

在告成東二十里關據嶺上潁水合山中衆

流至此滙為巨浸而出或云關下有怪石如羊故

名河南郡志云關口陡峻道路險隘僅容一車元

至正六年設

大谷故關

在潁陽鎮西北與倚箔山相近見唐書地

理志

潁陽鎮在登封西南七十里按潁陽縣兩漢時俱屬

潁川郡古人因潁立名今潁水在鎮東三十里發源而去遠不相涉此非兩漢舊地明矣自漢至隋沿革不常莫詳其處惟唐書地理志云載初元年析河南伊闕嵩陽置武林縣開元十五年更名曰潁陽夫嵩陽卽潁陽舊地乃隋時改名耳至於河南伊闕二縣俱在其西乃知古潁陽至此時始西徙唐五代宋元無改爲今之潁陽鎮可無疑也至於漢之潁陽必更在東方與潁陰夾水相近然不

高書
卷三
六
可考矣

告成鎮在登封東三十里即古陽城縣舊治至唐武
后因封禪中嶽始改名曰告成縣告成者告成功
也唐末天祐二年改名陽邑歷五代宋元俱并入
登封至今爲鎮而仍稱告成也舊志稱爲郛城而
強解之曰春秋郛子來朝之郛即是此地然不知
春秋有二郛取郛大鼎之郛北郛也在單州成武
郛子來朝之郛南郛也今單州有二郛城乃夾潞
鄭氏之說也按後漢郡國志云濟陰成武有郛城

此與嵩山告成有何干涉而妄為牽引耶

壇廟四

封禪壇在太室中峰唐武后萬歲通天元年封於神
嶽改元萬歲登封時建元和四年三月韓退之與
李渤盧仝上太室中峰宿封禪壇下石室見天封
觀題名歐陽永叔為西京留守推官時與梅聖俞
遊嵩登山頂至武后封禪處見有石記戒人遊龍
潭事載之跋中夫韓公之題名歐公之跋非僻書
也舊邑志漫以縣西封祀壇當之何耶

封祀壇

在縣西二里高原之上築土為之頂圓座方

其大踰畝前有豐碑下截剝落一字不復存上截歷歷可識首行云大周封祀壇碑銘并序下書春官尚書兼修國史上柱國梁王臣三思奉敕撰文殘不載年號在末亦泐去難辨矣記之存古蹟耳其人與事不足道也

八仙壇

在嵩山頂漢武帝見八仙圍棋於此因建唐

武后重修今廢

琉璃壇

在嵩山下唐高僧趙州從諗傳云少往嵩山

琉璃壇納戒或曰即會善寺戒壇也唐時天下僧
流咸受戒於此寺西別建一院為戒壇院大曆二
年選東都白馬等寺僧赴戒壇灑掃講律省牒下
寺宰臣列名及謝表至復賜手敕獎諭之其重如
此今壇圯基石猶存雕鏤精工足稱絕代

中嶽廟在太室東南黃蓋峰下去縣八里莫詳創始
之年按漢武帝詔曰其令祠官加增太室祠則自
武帝以前已先有祠帝特加增耳又按唐韋行儉
廟記云元魏徙廟於嶽之東南若謂元魏以前廟

在別所者今廟正南神道數十步有古石門隸書
銘詞雖泐尚可讀內有聖朝肅齋衆庶所尊等語
銘後刻云元初五年四月陽城長左馮翊萬年呂
常始造作此石門按元初漢安帝時年號觀此則
廟不自元魏始明矣歷代各有重修碑文見章成
篇規制弘敞松栢森蔚爲一方寺觀之冠

禹廟

嵩下故無禹廟萬曆壬子春知縣傅梅申請創
建在東關外每年二祭以益配之其公移略云按
孟子稱禹避舜之子於陽城益避禹之子於箕山

之陰皆邑境也今境內寺觀如林而禹益獨未
廟人殆不知爲聖王過化之所矣夫益烈山澤而
未膺曆數姑置無論乃若大禹功在萬世至今觀
河洛者尚且思之矧朝覲訟獄謳歌所自起之地
可泯泯無聞乎云云

廟公廟在告成鎮測景臺後弘治間知府陳宣建嘉
靖七年知縣侯泰重修萬曆壬子知縣傅梅重修
仍申請增置守役其公移略云元聖燮理精神寄
此一席之地廟而祀之是矣惟是晨昏啓閉僅一

老僧司焉無論周公儒宗不宜以異端緇流承應
左右且此僧毫無養贍強半出乞以致神宇之內
狐鼠縱橫庭階之前鞠為茂草殊為褻慢乞比洛
陽例於本廟添置門子一名云云

啓母廟

在太室山下啓母化石事詳載靈緒篇廟在

石傍莫考其所自始古亦稱開母祠見嵩高山記
唐高宗幸嵩山敕令重修命崔融作碑銘見章成
篇文內有云紅葩奪日飛絮榭於山間綺綴衝風
架迴廊於木末可想見其壯麗矣今亡

少姨廟在少室山下亦莫詳其所自始唐高宗幸嵩
山敕令重修命楊炯作碑銘略云臣謹按少姨廟
者則漢書地理志嵩高少室山之廟也其神爲婦
人像者則故老相傳啓母塗山氏之妹也又云珠
簾璫匣上高閣而三休金柱銀楹出長廊而中宿
與啓母廟可稱頡頏也今亡

仙官廟

在中嶽頂昔唐明皇封太山回問司馬承禎
曰五嶽何神主之對曰嶽者山之巨鎮而能出雲
降雨爲國之望然靈仙所隱亦有仙官主之於是

詔於五嶽山頂各立仙官廟今亡

潁源廟在陽乾山潁源之上以祀水神唐時建有韋

莊題詩見韻始篇

石人廟在太室山與啓母石相近見崔融碑文今亡

玄帝廟在太室頂玄龜峰之上有天池玉井

九龍廟在嵩山東九龍潭上

迎仙廟在嶽廟之西望朝嶺上

昇仙太子廟在緱氏山上以祀王子晉者有武后御

製碑文

純孝伯廟在潁源之上以祀潁考叔者金人元好問
有詩

宮觀五

崇福宮在縣東北五里許太室萬歲峰之下漢武帝
元封元年登山聞呼萬歲建觀於此唐改名太乙
觀俱見碑記至宋更名崇福宮增置殿閣設提舉
管勾官命朝臣領之為祝釐之所內有真宗元神
本命御容三殿而真獻后亦設像於西閣帳內宮
後有奕棊檟蒲泛觴三亭遺址尚存

嵩陽宮

在縣正北五里許嵩山之麓魏孝文帝太和八年勅造伽藍名嵩陽寺司空裴衍旣隱嵩山即爲寺主記稱塔殿宮堂星羅棊布光輝宇宙色煥雲霄足知其盛矣東魏天平二年重修鐫碑記之唐改爲嵩陽觀高宗麟德元年將碑移入會善寺玄宗天寶三年命道士孫大冲鍊丹於此宰臣作聖德感應頌中唐改名天封觀見韓文公石柱題名宋名天封宮見歐陽文忠集元名嵩陽宮見碑記今宮廢三柏尚存

奉天宮與嵩陽觀相鄰在逍遙谷之右唐高宗永淳元年建時帝旣封太山欲遍封五嶽監察御史裏行李善感諫曰數年以來菽粟不稔餓殍相望四夷交侵兵車歲駕陛下宜恭默思道以禳災譴乃更廣營宮室勞役不休天下莫不失望上雖不納亦優容之○按王適撰體玄先生碑云調露二年命以嵩陽觀爲奉天宮與正史稍異

三陽宮在告成東五里許石淙水上唐武后久視元年正月建四月后同太子相王群臣如三陽宮追

暑閏七月乃還磨崖刻二碑題詩紀勝長安元年
五月復如三陽宮七月乃還按張說諫疏內稱御
苑東西二十里可謂大矣事見唐書武后紀及張
說傳疏載章成篇詩載韻始篇

承天宮舊志云在金臺峰下金大定間建久廢無考
今土人所指爲承天宮者乃逍遙谷隆唐觀故址
也○按金人趙秉文有嵩山承天谷詩首句云煙
霞直上逍遙谷又云天與金臺玉柱齊豈承天與
隆唐相近耶抑隆唐後改爲承天耶

清微宮在縣西十五里少室山南麓頗占地勝而基不甚廣舊志云元至正年間建殊無所考也

萬歲觀

太乙觀

天封觀

嵩陽觀右四觀註見崇福嵩陽二宮下特表其名存古也無嫌重複

白鶴觀在太室上西去絕頂約四五里背負三峰左

右皆絕壁空南一面下瞰遠山如屏幽邃平闊實

太室之輿也一松亭亭如蓋木質盡成琥珀伐輒傷斧所以獨存舊縣志稱元至正十二年建恐不如此之近故老相傳浮丘公接王子晉即此地然不可考矣今其地猶有琉璃龍瓦必元時曾重修耳

隆唐觀在逍遙谷中按王適碑文唐高宗調露元年十月帝同武后如嵩山親幸潘師正之居敕有司即其廬建隆唐觀所云茂松清泉山中不乏此地是已今查唐書本傳則稱崇唐觀蓋後避玄宗諱

改之耳非有二也○按高宗同武后於調露元年冬弘道元年春冬前後三次訪師正於嵩山每車駕至帝以嵩陽觀為行宮后以間居寺為行宮更相名對微言秘旨世莫得聞以今觀之可發一笑也

精思觀在逍遙谷西嶺上按潘師正別傳唐高宗既為師正建隆唐觀又於嶺上別立精思院以處之後見孟浩然集有遊精思觀二首乃知唐人亦稱精思為觀矣予同袁中郎遊嵩陽宮於地下掘得

一石柱見熙寧五年題名有過天封精思之語又
知此觀至宋時猶在也今廢

紫虛觀在嵩山紫虛谷昔宋樞密使張昇請告結菴
於此見青箱雜記又賀蘭棲真曾居嵩山紫虛觀
見本傳

洞清觀在嵩南見唐許渾贈蕭鍊師詩序鍊師貞元
中自黎園進爲內妓善舞柘枝後聞神仙之事乞
奉黃老上詔居嵩南洞清觀至年八十雪膚花顏
與少無異渾題詩院壁以贈之

土德觀在中嶽廟西元天曆二年建明成化十八年

重修

崇慶觀在縣東關內置道會司

頤眞觀在縣南十八里小金店今俗稱下崇福宮

龍泉觀在縣東北二十五里

龍翔觀在縣東二十五里盧店鎮

玉溪觀在石羊關外五里許

清風觀在潁陽鎮西

玄都觀在潁陽鎮之南一里許

右自崇慶觀至玄都觀殿宇雖存碑碣絕少創始
世代不可考也

太微觀

丹霄觀

玉泉觀

通真觀

嵩仙觀

以上五觀俱見嵩陽宮元時廢碑僅存其名

不知其地矣

寺院六菴附

大法王寺在縣北十里嵩山之南麓備考志傳乃漢

明帝永平十四年創建魏明帝青龍二年車駕駐

蹕更名護國寺晉惠帝永康元年前增建一寺名

曰法華元魏孝文帝避暑於此隋文帝仁壽二年

創造舍利塔又名舍利寺唐太宗貞觀三年敕補

佛像賜莊安禪僧名曰功德寺玄宗開元十八年

更名御容寺代宗大曆元年重修又更名文殊師

利廣德法王寺五代後唐因廢壞之餘分為五院

仍歷代舊稱曰護國曰法華曰舍利曰功德曰御

客至宋初五院僧願合居仁宗慶曆八年增置殿閣僧寮重造佛像賜名嵩山大法王寺金元與本朝俱因之寺背負嵩岑如倚左右高峰張兩翼如衛俯瞰二熊諸山排列如拱真天下形勝之區也

嵩嶽寺在法王寺西一里許元魏宣武帝於永平二年令馮亮與沙門統僧暹河南尹甄琛等同視嵩山形勝之處初興土木本離宮也孝明帝正光元年榜閒居寺廣大佛刹殫極國財僧徒濟濟彌七百衆堂宇落落踰一千間可謂盛矣後周斷廢佛

法欲以寺為觀以塔為壇未果至隋開皇五年始
改題嵩嶽寺又度隸僧徒四百五十人未幾兵亂
焚毀唐興重為修復特賜田碾四所武后每幸嵩
山則以寺為行宮送鎮國金佛像貯焉後中宗又
於寺前造十三層浮圖讀李邕碑想其壯麗宋元
以後漸墮偉觀今也荒涼不堪吊矣

會善寺

在嵩嶽寺西五里許本北魏孝文帝離宮也

魏亡為澄覺禪師精舍至隋開皇中賜名會善寺
唐興大加增飾有寧堵波琉璃壇記稱歲成具戒

者盈千日受潔供者數百可謂一時之盛矣朱梁
初營宮闕撤佛殿材木輦致汴京寺廢壞者六十
餘載宋開寶初有僧奉言全審者同心發願募化
重修漸復舊觀金元至今代有補葺不甚荒落寺
右一泉泠泠流於堦下僅供僧汲至山門而隱亦
一奇也

少林寺

在縣西北二十五里少室北麓五乳峰之隈

後魏孝文太和中建沙門跋陀自西域來詔有司
於此寺處之廼於寺西臺造舍利塔龕經堂周建

德中滅法廢寺大象中即興復之尋改名陟岵寺
隋高祖受禪特令寺名仍舊開皇中詔賜少林寺
柏谷屯地一百頃大業末寺為盜焚獨塔存焉王
世充僭號洛邑立戍柏谷將圖梵宮寺僧志操惠
瑒曇宗等率衆擒世充姪仁則獻之於唐時太宗
為秦王賜書慰獎仍賜柏谷地四十頃水磨一具
既一天下盡廢偽主寺觀此寺特蒙置立歷太宗
高宗武后朝屢被恩寵玄宗開元中御書碑額七
字命鐫刻文皇手書於寺中裴漼作文記之歷代

相繼修營今獨完好

峻極寺

在太室絕頂中峰之上按金碑云後唐天成

間有僧安禪師自金陵來駐足斯峰感文殊降迹
遂立殿一所至晉天福年中賜額峻極禪院至宋
末王貴妃自備俸錢重修大殿後遭兵火廢蕩無
遺金大定間有忠公禪師者經營數載院宇重新
此峻極之始末也予按峻極寺有三院在中峰者
為上院在山麓者為中院在西關者為下院後上
中二院俱廢獨下院存耳今為朝賀習儀之所

永泰寺在縣西北二十里太室之右足後魏正光二年孝明帝之妹出家爲尼敕爲置此本名明練寺周武時廢隋開皇中重加修復又度尼若干人唐貞觀三年議尼寺居山慮恐非人侵擾敕令移額於偃師至神龍二年嵩嶽寺僧道瑩奏請重修追薦故永泰公主改名永泰寺記稱簷宇四繞迴廊復周蹬道凌虛懸階數百倚山臨水亦名刹也今寺廢將盡有石幢石獸數事雕鏤精巧近代所無盧巖寺在縣東北十五里太室之左麓也踰嶺渡澗

五六轉始望見寺門峰巒環繞寺後有瀑布泉茂
樹清湍足稱幽勝相傳是盧鴻故居因名盧巖按
盧徵君所居自號寧極乃官為營建者鴻又廣學
廬聚徒至五百人規模闊大其沒也子孫不宜居
遂舍宅為寺此理之可信者第按鴻所自著嵩山
十志有太室南麓天門石崖之語與此東西相去
踰三十里鴻不應有兩宅也又按李白集有贈盧
徵君昆弟詩云二盧竟不起萬乘高其風惜史逸
其名意盧巖或鴻之昆弟故居耶

下盧巖寺在盧巖寺東南三里平坡之上登盧巖者自此寺後方漸高也

龍潭寺縣東北二十里在盧巖之北隔一大嶺由嶽廟赴寺者渡嶺沿谿令人應接不暇寺據太室左陸面前平壤可容萬馬倚山環水規模壯麗自寺右登山五七轉折便至九龍潭潭上三面山圍中開平地數十畝形勢絕佳相傳武后游龍潭時曾建離宮於此後改爲上龍潭寺今廢武后有同太平公主游九龍潭詩見類苑或曰今龍潭寺在金

元時稱龍潭下院

碑樓寺在縣東四十里平原之上內有豫州劉刺史
碑石惡字泐逸其名矣寺前二里許有聚落古名
劉碑村蓋以此也又一斷碑文不可讀後僅存天
寶八年等數字乃知寺為唐人建也

在孫寺在縣東南四十里蔣庄古碑猶存碑陰刻大
齊河清三年歲在甲申敬造惜文字剝落殆盡不
可讀矣

龍華寺在告成鎮測景臺之東齊武平元年建

馬鳴寺在縣東四十里景店之南金大定十四年建

西勝寺在縣東五十里大冶鎮元至大年間建

清涼寺在縣西二十里少室清涼峰之下金貞祐四

年重修

華嚴寺在縣西三十五里水磨灣之上金正大三年

建

寶林寺在潁陽鎮南門外元至大間建

三峰寺在縣西九十里大峽內背山如屏面水如帶

元至正元年建

右諸寺創建之年大半考諸正統間舊志所載彼時古人碑碣尚有存者八朝以來爲前邑令磨平遽鐫時貴詩文用之幾盡矣貞珉之災慘於秦火良可歎恨亦有寺僧苦於搨取而潛瘞之土中者瓦礫縱橫荆蒿滿目予雖有好古之心從何處一一尋覓耶今通將基宇僅存世代無考者錄其名與地於左方

玉泉寺在石羊關外泉自地湧水光如玉

淨明寺在縣南三十里南店之東對箕山環潁水

大嶽寺在縣東南五十里費庄之陽

黃峪寺在縣東南四十里小熊山白栗坪之陰

水峪寺在縣東南五十里大熊山麓其南曰臥羊坪

石門寺在縣東南五十里石門山下境頗幽奇

竹園寺在縣東南六十里大熊山之陰

龍泉寺在縣西南五十里石道鎮

寶勝寺在少室寶勝峰下今廢

弘化寺在清涼寺西北一里許今廢

普照寺在縣西五十里胥店鎮

崇法寺在潁陽鎮西門外

溫姑寺在潁陽之南三里許

菩提寺在潁陽北二里背山面水松柏森然

清水寺在石堂山東嶺上襟山帶水亦勝境也

白雲寺在縣西八十五里于家集

宣陽寺在縣西九十里東王村

崇福寺一名潭榆寺在縣西九十里

普明寺在縣西南一百二十里丁流鎮之西長河當

門遠山列障去嵩雖遠然嵩之餘也而嵩山之寺

盡於此矣

又有史傳明繫嵩山而基址漫滅無考者書之以存舊蹟吊古君子或有契焉目列於左

道場寺

馮亮為宣武造閒居佛寺林泉既奇營製又

美曲盡山居之妙亮時至京師延昌二年冬遇疾還居嵩高道場寺見北史

石窟靈巖寺

北魏永熙二年正月齊獻武王自晉陽

出討尔朱兆大破之於赤洪嶺兆遁走自殺車駕幸嵩高石窟靈巖寺見魏書

天中寺唐蘇味道有天中寺尋復禮上人詩云藩戚
三雍暇禪居二室隈見類苑

封禪寺五代時高僧貞峻在嵩山會善寺戒壇院納
法因棲封禪寺學新章律疏見高僧傳

戒壇院在會善寺西二百步許積翠峰下古稱會善
寺戒壇院非另一寺也其壇名琉璃壇唐宋時天
下僧尼受戒於此有四石刻天王像立四隅未圯
其餘棟柱陛礎石雕鬼神山水之形今俱卧荆棘
中矣壇東有元僧學士溥光石刻茶榜獨完好字

徑二寸頗具風骨

峻極中院在太室之麓今廢

峻極下院在西關今為峻極寺頗稱修整內有古檜

數株

寶林院在中嶽廟北黃蓋峰之傍今廢

龍潭院在縣東北大寧保今廢

淨明院在縣南高馬保按舊碑云金貞祐四年僧法

通重修

護國院

法華院

舍利院

功德院

御容院

以上五院註見前大法王寺下

面壁菴

亦稱初祖菴在少林寺西北三里許即達磨

九年面壁之處也背倚五峰前臨霞澗古松偃蓋

古柏參天爲山中之勝境菴有蔡卞署書黃庭堅

頌俱鑄碑寺西閣簷下有石刻面壁之菴四大字

則蔡京書也菴內影石不類好事者爲之耳

二祖菴在少林寺南鉢盂峰之巔乃惠可禪棲地也
菴前有四井探手可汲泉味甘美名卓錫泉門對
高岑稍升之西北望伊洛二水如雙白練平鋪煙
靄中亦奇觀也

寶珠菴在縣南白栗坪西十里南北有石門境有幽
閒之趣

白雪菴在城東南十四里雷家岡之南

朝陽菴在白栗坪河西

吏隱菴宋國博龐元常隱嵩山所築司馬溫公有詩

今廢

張相公菴在萬歲峰之前見邵堯夫集惜不著張之名也

郎官菴與羅漢洞相近金元光二年菴僧慧朗曾與五渡保民郭道寧同修羅漢洞見碑刻

長春菴

谷神菴二菴見嵩陽宮元時仆碑

控鶴菴在嵩山顛最淡處宋劉居中居此二十年壁間得異書習之成仙又孫登天臺賦曰王喬控鶴

以冲天菴名蓋取諸此今不詳其處矣

臺殿七

測景臺在告成鎮即古陽城地也有石方可仞餘聳立盈丈上植石表八尺刻其南曰周公測景臺按周禮大司徒職以土圭之法測土深正日景以求地中故云日南則景短多暑日北則景長多寒日東則景夕多風日西則景朝多陰日至之景尺有五寸謂之地中鄭衆說土圭之長尺有五寸以夏至之日立八尺之表其景與土圭等謂之地中今

潁川陽城地也鄭玄云凡日景於地千里而差一寸景尺有五寸者南成日下萬五千里也以此推之日當去其下地八萬里矣日邪射陽城則天徑之半也天體員如彈丸地處天之半而陽城爲中則日春秋冬夏昏明晝夜去陽城皆等無盈縮矣故知從日邪射陽城爲天徑之半也隋志云昔者周公測晷景於陽城以參考歷紀杜氏通典云儀鳳四年五月命太常博士姚玄於陽城測景臺依古法立八尺表夏至日中測景尺有五寸正與古

法同唐地理志云陽城有測景臺開元十一年詔太史監南宮說刻石表焉即今表是也古人置臬之法變矣

觀星臺

在測景臺北高五丈闊二丈名曰觀星臺

磚

甃尚完想亦唐所建也臺北面凹入數尺懸直而下相傳為滴漏之所莫曉其製下有平石數十方向北接連一路闊一尺高二尺約長十丈石面有通池二條其寬如指至北盡頭處合而為一此必古人用以置水而取平也隋天文志云考工記匠

人建國水地以縣置槩以縣眡以景爲規識日出之景與日入之景畫參諸日中之景夜考之極星以正朝夕又按梁祖暉造八尺銅表其下與圭相連圭上爲溝置水以取平正揆測日晷求其盈縮由此觀之則知測景觀星置水雖似三事總之所以求地中耳

登仙臺在少室峰下漢武帝所築見戴延之西征記
玉女臺漢武帝於嵩高山見三仙玉女因以名臺見
盧元明嵩高山記又雜道書云嶽廟東二十里有

龍門山其東有三臺山昔漢武東巡過此見學仙
女遂以名焉二事相類而名稱不同今其地土人
不知有三臺山山下聚落俗稱為玉臺村豈玉為
三字之訛耶抑原名三玉女臺而古今省文呼耶
集仙臺在縣東北八里太室山下漢武帝築見通志
思仙臺在少室峰下淮南王築見玉海

金龜臺在縣北一里今廢

甘露臺在少林寺天竺僧跋陀翻經之處

鳳凰臺在嶽寺之右唐高宗時有鳳凰飛集於此

逍遙臺

在嶽寺之後

覓心臺

在鉢盂峰二祖菴之前南倚峭壁下臨無際

乃慧可覓心處也舊稱鍊魔臺

望母臺

洧水之南有鄭莊公望母臺蓋克段置武姜

於城潁之後故築臺以望母後感考叔之言爲母

子如初見水經注按地理志洧水出陽城

倒景臺

在太室南麓天門之下盧鴻十志之一也

揖仙臺

在登封縣衙內宋縣令樓昇築

怨臺

在太室之下相傳前邑令有偃蹇負奇而有所

感觸束於世法不得敢言時登此臺以自遣遂以
怨名之惜令之名無所考矣予錄至此竊笑此君
之福也浮雲泡水石火空華偶爾現前轉眼成幻
何所怨乎已而思之子曰可以怨則怨亦聖人所
不禁矣

峻極殿中嶽廟正殿九間宋元舊制弘麗非常萬曆
壬子春知縣傅梅重修殿額為宋人書用顏魯公
麻姑仙壇體道勁有態可寶也

鳳陽殿北魏離宮殿名後改為間居寺七佛殿

八極殿 北魏離宮殿名後改爲西方禪院

黃錄殿 在嶽廟之後今貯 欽降道藏經函於此

太乙殿 唐時太乙宮正殿名見古碑

祈真殿

保祥殿 二殿宋時崇福宮殿名今廢

元神殿

本命殿

御容殿 三殿俱在崇福宮宋時爲真宗建今廢

樓閣八

黃中樓

中嶽廟之南門也門臺高踰三丈上建樓五

間修簷曲檻碧瓦覆之頗稱偉麗嘉靖戊午知縣
劉汝登建工部尚書朱公衡改名天中閣今兩稱
之

逍遙樓

在閒居寺本魏之離宮也見李北海碑

嵩陽樓

孟浩然有陪張丞相登嵩陽樓詩見本集

陽春樓

即登封縣大門譙樓也予重新之為改今名

考辰樓

在登封新城東門上懸大鐘一具晨昏考之

民以作息

大觀樓登封新城南門上嵩高若屏潁水如帶天下之大觀在是矣

寶成樓登封新城西門上西方屬秋正萬寶告成之候書之祝農也

天咫樓登封新城北門上開軒先見萬歲峰西北神京在焉天威不遠顏咫尺一舉足不敢忘○以上四樓俱知縣傅梅於萬曆辛亥春創建

天中閣註見前黃中樓下

毘盧閣一名千佛閣在少林寺後萬曆戊子年建

藏經閣在少林寺閣後有秦槐文潞公作詩咏之今
亡

書院九

太室書院在太室山下五代周時建宋至道三年四
月賜太室書院藏九經是年河南府守臣上言甘
露降於書院講堂

嵩陽書院即太室書院舊基景祐二年九月敕西京
重修賜額更今名及田一項金元時廢於兵火本
朝嘉靖七年知縣侯泰即嵩陽宮故址起屋數楹

前為二程祠後稱嵩陽書院僅存其名耳

潁谷書院

在潁陽鎮城西北隅元皇慶二年里人即

宋故縣學基為殿以祀先聖先師至元五年登封

縣令閻詢重加開拓達郡奏聞於朝賜扁今名禮

部尚書王沂為之記

少室書院

在轅轅關上正德丁卯河南太守沈文華

毀淫祠而建之者給事中段豸有記今廢

存古書院

在縣南城下學宮之左萬曆辛亥秋知縣

傅梅建以為諸生講業之所將二室諸斷碑殘碣

梵置四壁故以存古名自有記

亭館十

萬歲亭

漢武帝元封元年登太室聞呼萬歲者三因

於太室山下建亭焉亦見西征記今廢

負黍亭

史記徐廣註云負黍在陽城括地志云負黍

亭在洛州陽城縣西南三十五里故國邑也今廢

聖水亭

在嵩高山後

芝和亭

在太乙泉之左

甘泉亭

在崇福宮後

立雪亭在少林寺即二祖神光立候達磨之所傳稱

雪淡過膝不動

景雲亭在嵩下郡志云見唐詩

觀瀾亭在石淙

飛泉亭在盧巖寺後瀑布之前

生賢亭在嶽廟峻極門內壁畫申甫像今亭尚存像

剝落矣

御香亭在嶽廟峻極殿東

御帛亭在峻極殿西二亭爲朝廷遣祭置香帛之

所

有斐亭在縣衙內前多菴竹子爲額之

醉雨亭在望朝嶺西二里許萬曆庚戌夏久旱之後
忽得甘霖予省耕過此息於樹下有以壺觴獻者
予飲輒至醉邑人咸以爲異蓋予三載無酒容矣
是年果稱大有西成旣畢衆即其地建一亭以志
不忘予命之名並爲之記

樾館盧鴻一嵩山志云樾館者即林取材基巔拓架
居不期逸爲不至勞清淡娛賓斯爲尚矣

啓秀館

在城中邑人太僕少卿焦公子春建爲子孫

講業之所公年八十甚健自督課之仲孫孝廉弘祚予門人也博學能文請予命額予取陸機文賦語而題之以相勗云

堂室十一庭附

弭節堂

在嶽廟西便門外稍北爲使者致祭齋宿之

所洪武中建萬曆戊申夏知縣傅梅重修改題今名

盡心堂宋縣令管景文建李彥作記見通志

仰嵩堂在登封縣治宋縣令樓異建畫太室二十四

峰於壁間各題以詩今廢

廓然堂在少林寺方丈後前巡撫河南都御史蔡公

汝楠建今廢

草堂在太室下盧鴻一建志云因自然之溪阜前當

壩洫資人力之締構後加茆茨定不俗也

望稔堂在縣治正堂之後即後堂也前令丁應泰建

予重修改題是名有記

永譽堂在望稔堂之後隔一門以限內外非有呼名

吏卒不得入矣萬曆庚戌冬知縣傅梅新建前有
檜四株梅竹各數本旁一小室曰茶寮自作記刻
於石

永化堂在少林寺門外東南山根下萬曆三十四年
周王為住持正道建中央起大廈三進此其最後
一進也翼以周廊備極華侈

存古堂

即存古書院正堂也註見前

洞元室

在太室之下亦盧徵君所建也志云因巖作
室可想其制矣

枕煙庭

纂翠庭二庭俱盧徵君建見嵩山十志載韻始篇

門闕十二坊附

崇聖門在嶽廟宇宙具瞻坊之北第三重門也

峻極門在峻極殿之南累朝祭文立碑其下

仙遊門唐高宗營奉天宮與逍遙谷相鄰特於谷口

闕一門曰仙遊門又於苑北面置一門曰尋真門

與隆唐觀相接皆為潘師正而立名也

尋真門註見前

春雨門

登封新城東門東作之方落成而雨志祥也

黃離門

新城南門中嶽之陽麗得其正文明之象也

鴻澤門

新城西門荒年之後幸獲安集又允為澤鴻

大也

萬歲門

新城北門出門望見萬歲峰不忘君也○右

四門俱萬曆辛亥春知縣傅梅勅建各命以名

中嶽廟石闕

在廟正南神道百步許漢安帝元初五

年陽城長呂常造闕左有八分書字雖剝落尚有

一半可識乃銘也其詞曰惟中□□□崇高神君

□□□□休□最純春生萬物□方起雲潤施源
流□淙□宣並天四海莫不蒙恩聖朝肅齊衆庶
所尊□□奉起□□盡勤□□功德刻石紀文□
顯□異以傳後賢

啓母廟石闕

在啓母石正南百步許漢安帝延光二

年潁川守朱寵等造闕左有大篆書銘二篇取其
字可辨者錄之於後銘曰□□□工範防百川柏
鮪稱遂□□□原洪泉浩浩下民震驚□□□功
疏河寫玄九山甄旅□□□文爰納漢山辛癸之

間□□□人寔勤斯民同心濟□□□正□繒

□替又遭亂秦聖漢福亨於茲馮神徧彼飛雉□

□其庭貞祥符瑞靈支挺生□□□化陰陽穆清

興雲降雨□□□寧守一不歇此性乾坤福祿來

□□宥我君千秋萬祀子子孫孫金碣銘功昭眡

後昆□□□延光二年 重曰 □□□

□作辟德洋溢而溥優□□□政則文耀以

消愴□□□時雖皇極正而降休□□□□

穎芬茲拊於圃疇□□□□□木連理於芊條

□□□□盛昨日新而累熹□□□而慕化成
來王而會朝□□□清靜九域□其脩治□□
□□祈福祀聖母乎山隅神□亨而飴格釐我后
以萬祺于□樂而罔極永歷載而保之

少室石闕在少室之東邢家鋪西二里許闕左亦有
大篆書銘盡泐不可辨僅一石存諸人爵里姓名
數十字與啓母廟石闕相同二闕乃一時建者此
必少姨廟舊基也然不可考矣

嵩山絕無漢人碑碣蓋有三石闕云三闕制度相

類俱疊石為之相去各二丈許而空其中雖漸就
敝壞幸俱未隕惟是下為積埃所掩巍然對峙者
僅丈餘耳石鐫山水鳥獸之形古拙特甚若出一
手右所錄銘三篇文既簡質字體復毫髮不失古
意固知非唐以後人所能辦也舊志既絕不載而
故老更無一人知此間有字者予磨洗得之喜而
且歎此鐘鼎間物何為埋沒數千載至今始出吉
光片羽價踰千金錄而存之不當勝崔融楊炯輩
文萬萬耶

宇宙具瞻坊在天中閣之北萬曆庚戌春知縣傅梅

創建四柏爲柱金碧相輝

位中四嶽坊在嶽廟東南舊坊盡圯予鼎建之仍其

名

秩比三公坊在嶽廟西南舊坊題秀毓三河予重修

而改題焉

祠墓十三

許公祠在箕山之上舊有許由廟歲遠盡圯萬曆辛

亥春知縣傅梅重修爲改今名又置山下地三百

畝爲祭田申請加增春秋二祭公移大略云夫許
由辭帝堯之禪耕潁水之濱洗耳挂瓢固隱士之
高蹈也至今聞其風者尚可廉頑立懦儻有司歲
時顧瞻祠墓油然而有感於心必且輕富貴而重名
義豈復有貪苞苴而玷簠簋者哉風化所關良非
淺鮮俎豆之舉合當亟修云云

潁考叔祠在潁陽鎮西門外者名潁考叔祠在潁源
之上者名純孝伯廟蓋兩處香火也兩存之

二賢祠

在縣學內祀周申伯甫侯見通志今二公俱

祀鄉賢前祀久廢矣

二程祠

一在嵩陽書院一在縣東關外蓋因二程子

曾領崇福宮祠嵩山其所宦遊之地也前令丁應泰爲置祭田又請於督學使者給其子孫各一人衣巾奉祀

李拾遺祠

在少室山下以祀李渤者嘉靖九年知縣

侯泰建

盧徵君祠

在盧巖東嶺舊祠久廢嘉靖九年知縣侯

泰重修

靖長官祠

在縣西關外萬曆壬子秋知縣傅梅鼎建

按靖長官者乃唐末登封令應靖也靖在縣日丁黃巢之亂率百姓往保太室得免於兵尋即棄官學仙隱其姓而以名行山中之人稱為靖長官云詳見黃齋篇

許由墓

在箕山之巔太史公曰予登箕山其上蓋有

許由塚云

巢父墓

在縣東南四十里與箕山相近元人楊奐有

詩

啓母墓帝王世紀云陽城有啓母塚予謂啓母既有塚則化石之說謬矣

商均墓在縣南山見郡志

周昭王墓在陽城西谷見通志

潁考叔墓在縣西南柳東保

周聖墓在少林寺東見舊志未詳

京兆王墓在嵩山上按魏書王景穆皇帝孫也諱太興除守衛尉卿因患病佛前乞願若病差即捨王爵入道未幾便愈遂請爲沙門於四月八日下髮

更名僧懿居嵩山太和二十二年終葬於山頂

魏裴植墓

植歷官度支尚書表請解官隱嵩山世宗

不許尋以怨望被譖誅死遺令子弟命盡之後剪落鬚髮被以法服以沙門禮葬於嵩高之陰

蕭贊壽陽公主合葬墓

贊本蕭寶卷遺腹子寶卷滅

後蕭衍納贊母吳氏宮中生贊以爲己子封豫章王及長其母告之以實贊遂奔魏爲寶卷追服三年喪歷官太尉尚莊帝妹壽陽長公主後亦朱變作公主以持節遇害贊棄官爲沙門尋卒晉泰末

命以王禮與公主合葬嵩山

唐盧殷墓殷登封縣尉卒葬嵩山之下韓文公作墓

誌銘

五代漢高祖墓即睿陵也五代史云在告成縣一統

志云測景臺之左

宋郢國張公墓在登封縣見琬琰集

橋梁十四

綰嵩橋在萇嶺口西北三里許上當二室之交下臨

無際洛京諸處人來嵩者無不由之過此則步步

高陟矣橋自有名予嫌其不雅也爲易之地屬偃
師縣

少溪橋在少林寺門前稍東萬曆辛亥春周王捐貲
創建寺對平溪遇旱則乾遇澇則流辛壬之際涓
涓不絕矣橋名慶壽乃住持僧貢諛於王者予笑
其俗也爲更是名夫山曰少室寺曰少林中界是
溪安得不謂之少乎

半虹橋在縣東南三里許高家莊之左萬曆己酉春
邑人公建請予命名遂以半虹題之

美蔭橋在石羊關之西橋傍有高柳一株蔭可三畝
鄰村之樹更無大於此者予立石戒後人勿得剪
伐因以名橋

平梁在縣西南二十五里潁水之上及冬則架入夏
則撤用舍靡常成毀隨化登者不喜涉者不怒

歎梁在太室峽中溪澗之上土人伐山得巨柏焉大
踰十圍長可百尺斲之可惜運之不轉遂棄置於
此樵牧牛羊往來取捷名爲獨木橋予探幽至此
不覺歎也歲月荏苒風雨飄搖三殿之役方興川

蜀之使未返此物乃沈淪於此乎名曰歎梁

池井十五

中天池在太室之巔其水甘冽冬夏不涸庾開府溫

湯碑曰嵩山三仙之館不孤擅於天池即指此也

洗耳池在潁水之上即巢父洗耳處也曹子建三士

贊有曰池主是讓以水為濁夫池既有主必其所

鑿也

芙蓉池

菡萏池

二池俱宋登封令樓昇所鑿在縣衙中昇有

小序詳見韻始篇

京兆王池 在太室頂西北魏京兆王太興出家居嵩
山時所鑿也今廢

飲鶴池 在子晉峰上乃王子晉飲鶴之處也或曰在

緱山

湛池 在太室虎頭峰下二郎觀前舊無名予爲題之
翻珠池 在石羊關外東北數里鄉民鍾思愛地中池
水高平地數尺泉清徹底滾滾騰湧而上如亂珠
翻動真奇觀也且其地有山環溪繞密樹長堤素

鳥成群竹蒲掩映惜縣遠不暇常往耳予旣命爲
甃其池又以翻珠名云

卓錫四井在少室鉢孟峰上二祖菴之前各離丈許
雙雙相對千仞峰頭不知當時何以知泉脉在此
而鑿之也亦神奇矣

左龍井

右龍井二井在逍遙谷之北太室半山處象極石洞
前左右相離丈許乃石井也探手可汲泉味甘美
舊名潘真人井予改題是名

雲母井在少室上見嵩高山記樓异賦云雲母之井
兮寶所聚指此也

鄉保十六

大寧保即中嶽廟所建之處在太室東南附近諸鄉
有天中街新店焦河栢林土橋五渡

唐莊保在大寧保東北十五里許附近諸鄉有馬跑
村龍尾溝馬蹄溝玉臺麻河龍池

盧店保在唐莊保正南八里許附近諸鄉有花園角
五司村分水嶺蝦蟆石景店

劉碑保

在盧店保東南十五里許附近諸鄉有三溝

洞頭曹村馬峪石啓洞石羊關

大冶保

在劉碑保東北十六里許附近諸鄉有沁水

鴻河東施村西施村小冶村娘子臺○以上五保

俱在太室正東

崇德保

在大冶保正南八里許附近諸鄉有神仙坡

鴈翎坡費庄玉睢

廟莊保

在崇德保正西十五里許附近諸鄉有水峪

虎牌嶺濺窩口石門溝舜王廟

曲河保

在廟莊保西北十里許附近諸鄉有許由

石淙煙莊格子溝告成鎮竹園村界頭范店八坊

○以上三保俱在太室東南

高馬保

在曲河保西南十五里許附近諸鄉有碑子

村白栗坪小熊砦背陰坡庫莊券門牛蘭村南店
黃鹿灣少沙灣

寺莊保

在高馬保正西八里許附近諸鄉有二郎溝

紅花溝駱駝苑胡嶺山雙圭嘴沙園麻池嶺

金店保

在寺莊保正西十五里許附近諸鄉有小金

店孤竹坡海鴈村黃沙嶺蹬槽花門書堂磧磴坡
念子莊李莊河○以上三保俱在太室正南少室
東南

王上保 在金店保正西十里許附近諸鄉有右河太
右廟楮河孩兒溝

石道保 在王上保西南八里許附近諸鄉有陽乾山
水神里澤峪溝金星廟送表三教堂竹園黑峪溝
○以上二保俱在少室正南太室西南

胥店保 在石道保西北十二里許附近諸鄉有海子

村夾山核桃園板棚

柳東保在胥店保西北八里許附近諸鄉有子推廟

官莊水磨灣竹園溝黃城溝石佛寺柳巷○以上
二保俱在少室西南

榆東保在柳東保正西十二里許附近諸鄉有潁陽

鎮梧里頭凹裡風門山接仙廟潭臺

榆西保在榆東保正西十里許附近諸鄉有江左河
院莊石門

呂店保在榆西保西北十二里許附近諸鄉有丁流

鎮牡丹溝椿樹莊油房溝喇嘛店○以上三保俱在少室之西

坊廓保在縣城周圍太室之南麓少室之東麓附近諸鄉有石場斗溝少陽河沙溝河卧牛石觀音頭郭店保在縣城西十五里許二室之界附近諸鄉有試劍石待仙溝夏店河水牛屯

語云桃李不言下自成蹊夫桃李春華不過五日夏實不過十日耳其下猶且成蹊矧二室之間勝蹟如林宮牆棊布宜乎輪蹄交錯於道矣夫興雲

致雲莫居生物民所利者山也乃至以山之故車
馬雲雲日候於境上悉索敝賦供搢紳之盤游使
其父老子弟困於征繕不遑寧處焉是山反爲民
害矣憶予初至無年山下之田荒蕪滿目所過村
落頽垣敗屋光景蕭條予日日蒿目憂心計所以
招來而安集之如是者三載意實未嘗在嵩也乃
每每爲過客牽帥於崇山峻嶺之間不問民窮惟
傷寺觀之廢噫天神不屋棲况夷狄之鬼乎嵩山
除大禹周公許由二程等諸廟外其他一切神宇

皆狄梁公所謂淫祠也官方愧不能毀寧勞置歎
耶幸而庚辛以來雨暘時若曠土盡闢部屋之炊
煙相望予每以公務適野旄倪歡迎偶息樹下黃
雞白犬亦來親人殊甚愉快儻閭閻之間常享此
樂即盡剷二室諸古蹟歸之無何有之鄉亦可也
予序卜營而以鄉保終焉意念淡矣

門人

高國亮校字

嵩書卷之三終